

四庫全書

史部

欽定四庫全書

行水金鑑卷一百九

江南按察使傅澤洪撰

運河水

明景帝景泰四年八月辛卯河南按察使僉事劉清奏
東南漕舟水淺弗能進可自淮入黃河至滎澤轉入沁
河經武陟縣馬曲灣裝載岡頭濬一百十九里以通衛
河張秋之決由沁水合黃河遂成奔急之勢若引沁水

入衛河則張秋無衝決之患矣行人王晏亦言開岡頭
置閘分沁水使南入黃河北達衛河水漲即閉閘如此
漕運可永無患衛輝稅糧十四萬餘每一石令民出石
一尺可得一萬四千餘尺糧一石令挑河二尺可挑一
百六十餘里今所濬地不過百三十里免衛輝一府糧
可成其事何恤此小費而棄莫大之利也章上詔令總
督漕運右僉都御史王竑等覆奏以聞 丙午太子太
保兼工部尚書石璞得請歸省給事中國盛等劾奏璞

奉命往治沙灣未有成效正宜日夜勤勞求副上意乃詐以母老詭辭請去於三過其門不入者異矣宜下法司治罪詔工部移文令璞速赴沙灣毋致誤事 九月庚申常州府江陰縣民言本處順塘河長十里許東接永利倉運河西通夏港及揚子江可通舟楫灌溉田畝近為沙土淤塞乞勅巡撫侍郎李敏勘實開通以為民利從之 乙丑沙灣之決尚書石璞等鑿一河長三里以避決口上下與運河通其決口亦築攔截今新河運

河俱可行船至是以畢工聞工部欲取璞回帝恐不能
經久令璞且留處置 十月乙酉吏部言太子太保兼

工部尚書石璞奏保東昌府推官田峻魚臺縣典史彭
旭俱有才能乞各陞一級俾專理修河緣近河府縣已
增管河官員難從所保帝曰璞整理河道未見成功惟
務濫保官員本當究問但無他故姑恕之 十月甲午

陞右春坊右諭德兼翰林院侍講徐有貞為都察院左

僉都御史往治沙灣

明英宗實錄

石尚書以沙灣之
決鑿新河以通
運河俱可行船矣

乃奏保一推官一典史各陞一級而不可得奉
嚴旨責其濫保可見當時之慎重名器若此

是年二月築沙灣決口功成五月復大決北馬頭河
岸四十餘丈運道絕復遣石璞往十月命都御史徐
有貞治之始塞乃於開封金龍口甯瓦箱開渠三十
里引黃河水東北入漕河以濟運

北河續記

是年塞沙灣決口更作九堰八閘以制水勢

通漕類

編

先是河溢滎陽自開封城北經曹濮以入運河至兗

州沙灣之東隄大洪口而決濟汶諸水皆從之入海
會通河遂淤漕運艱阻工部尚書石璞侍郎王永和
都御史王文相繼治之凡七年皆績弗成乃集廷臣
議於文淵閣舉可治水者以有貞名上乃進有貞都
察院左僉都御史治之河以決故涸而有貞至方冬
月水暴漲公私之艘畢達治河卒踰數萬人悉與之
期而遣之乃乘輕航究河源遂踰濟汶至衛汴循大
河道濮范還上疏曰臣聞平水土要在知天時地理

人事而已蓋河自雍而豫出險即平水勢既肆又由
豫而究土益疎水益肆沙灣之東所謂大洪口者適
當其衝于是決而奪濟汶入海之路以去諸水從之
而洩隄潰渠淤滂則溢旱則涸此漕途所由阻然欲
驟堰則潰者益潰淤者益淤今請先疏下流水勢平
乃治決決止乃濬淤多為之方以時節宣俾無溢涸
必如是而後有成上從之

明紀事本末

明景帝景泰五年七月癸丑白溝河漲決保定杜村口

隄詔有司俟水降修築 己巳直隸揚州府奏六月大
風雨湖水泛溢決高郵寶應隄岸命左副都御史王竑
督有司修築之 八月戊戌湖南巡按御史張澗奏先
於原武縣黃河東岸開二河合黑洋山舊河道引水濟
徐呂二洪今黃河改決而北其新開二河淤塞不通臣
恐徐呂乏水有妨漕運請於黑洋山北黃河紆迴之處
自其缺口改挑一河以接舊道用灌徐呂其工可二萬
人其期可一月完從之 九月辛亥先是沁河決武陟

馬由灣隄五百九十餘丈漫流新鄉獲嘉入衛河沒民
田廬甚衆至是詔有司修築之 庚午總督漕運都督
徐恭左副都御史王竑言運河膠淺南北軍民糧船蟻
聚臨清閘上下者不下萬數蓋因黃河上源水塞亦以
沙灣缺口未塞而修治者之弗克事也臣唯治理之要
有經有權經者常行不易之道權者一時通變之宜以
沙灣關口不可合留之以洩大水之勢經也姑塞沙灣
關口引水注運河以通漕舟權也苟唯常道是執臣見

糧船淺凍不惟有誤今歲之糧來年之計亦必誤矣請
敕左僉都御史徐有貞將關口赴今水小急督工築塞
庶不敗事詔是之敕有貞務博詢衆策毋僻守已見有
貞言臨清河淺自昔已然非為缺口未塞也亦非臣僻
守已見而固欲不塞也竝等不察而以塞關口為急殊
不知秋冬雖僅能閉明年春夏亦必復決勞費徒施而
無用此臣所以不敢邀近功也如塞而無患臣雖至愚
寧不早為之詔從有貞言糧運亦無阻焉 戊寅戶科

右給事中何陞言臣往年使河南見衛輝南沁河有漏港今年水溢決已成河商船皆由之往來其臨清屯聚膠淺之舟若令其從漏港出沁河入黃河順流而下不二十日可至淮乞遣官往勘果如臣言即令以卸糧空船從漏港試其險易庶事有變通船無阻滯章入詔不必遣官其令都御史王竑徐有貞理之 十月丁亥工部奏近聞儀真瓜洲二壩每遇冬春潮水退縮之時往來舟船膠淺難行宜於二壩下各置閘於潮水漲時閉

開蓄水用通舟船從之 辛卯先是行人王晏請疏沁河漕運詔以其事廉問於有司及鄰河故老皆言弗利至是晏復備陳地勢水性之宜以質廉報之非帝命工部會文武臣議少傅兼太子太師吏部尚書王直等言地形水勢非可遙度宜遣官往彼相度利害詢知衆議必愜乎公無患於後或如晏言或外有長策奏報區處詔是之命工部右侍郎趙榮同晏往既而榮亦言弗利請治晏罪詔宥之 十一月辛亥詔修南京河口隄岸

丙子左僉都御史徐有貞言沙灣治河三策一置造水門臣聞水之性可使之通流不可使之堙塞昔禹鑿龍門闢伊闕無非為疏導計故漢武之堙瓠子終弗成功漢明之疏汴渠逾年著績此其明驗也世之言治水者雖多獨樂浪王景所述著水門之法可取蓋沙灣地土皆沙易致坍塌故作壩作閘皆非善計臣請依景法為之而加損益於其間置門於水而實其底令高長水五尺水小則可拘之以濟運河水大則疏之使趨於海

如是則有流通之利無堙塞之患矣一開分水河凡水勢大者宜分小者宜合分以去其害合以取其利今黃河之勢大故恒衝決運河之勢小故恒乾淺必分黃河水合運河則可去其害而取其利請相黃河地形水勢於可分之處開成廣濟河一道下穿濮陽博陵二泊及舊沙河二十餘里上連東西影牆及小嶺等地又數十餘里其內則有古大金隄可倚以為固其外則有八百里梁山泊可恃以為泄至於新置二閘亦堅牢可以宣

節之使黃河水大不至泛溢為害小亦不至乾淺以阻
漕運一挑浚運河臣唯水行地中避高趨卑勢莫能遏
故河道深則能蓄水淺則弗能今運河自永樂間尚書
宋禮即會通河浚之其深三丈其水文餘但以流沙恒
多淤塞後平江伯陳瑄為設淺鋪又督軍丁兼挑故常
疏通久乃廢弛而河沙益淤不已漸至淺狹今之河底
乃與昔之岸平其視鹽河上下固懸絕上比黃河來處
亦差丈餘下比衛河接處亦差數尺所以取水則難走

水則易誠宜浚之如舊章入詔工部移文詣有貞使即如其言行之

明英宗實錄

治河時有撓其議者曰不能塞河令不為患而開之令為患耶上遣中使問有貞貞出二壺一竅五竅者各一注水而並瀉之五竅者先涸於是使者曉然知疏策之為良也歸報命而議決於是有貞作治水開疏水渠渠起張秋金隄西南行九里至濮陽濼經博陵壽張沙河至東西影堂渠成賜名廣濟凡河流之

旁有不順者堰之堰有九長袤皆至萬丈架濤截流
柵木落竹以石實之而鍵以鐵曰合土木石金平水
性也又作放水閘於東昌龍灣魏灣閘有八度水盈
過丈則洩皆通古河以入海上制其原下放其流既
節且宣用平水道當是時蠲瀕河民牧馬庸役以專
力河防役丁夫五萬八千決口始塞復於開對金龍
口銅瓦箱等處開渠二十里引河水濟運事不中制
役以有成

南河全考

景泰五年甲戌陳泰遷左僉都御史疏理徐州呂梁

二洪及運河

明史稿

明景帝景泰六年二月壬午工部右侍郎趙榮奏先奉
敕會山東河南三司相度河道榮發身不由科目衆或
慢之榮含怒以山東三司正官不親至委官後期辱詈
之又以其委官不即遣人探河水淺深自攝衣涉水探
之以所過有司供需稍不謹輒杖之山東三司都指揮
王信左布政使龔理按察使劉孜及其委官署都指揮

陳忠參議梅森僉事胡鼎等因各上章言榮單馬馳走軍民驚疑杖傷縣官鬻廩米於民多取直等狀巡撫尚書薛希璉巡按御史張琛亦以聞帝命左僉都御史徐有貞覆之具得其情事下法司議榮辱詈三司自探河水雖若失大體然終為急於國事鬻米乃辦事官為之榮失於鈐束信等輒敢侮榮如兒戲誣榮為風顛構造危言抗拒敕旨宜命錦衣衛執之明正其罪希璉及琛符同信等奏榮亦宜附過奏入帝曰此輩以私忿相訐

奏本當究問但時方用工河道恐益稽慢榮置不問信
等令巡按御史責取招狀俾悉心修理務期成功若再
誤事不宥 壬寅湖廣華容縣醫學訓科王正中言本
縣民歲運京儲皆經行洞庭湖春夏水漲人多被溺秋
冬水涸舟復不通往返搬運勞苦萬狀臣見附近有河
一道昔晉杜預所開者但淤淺少水乞敕有司於農間
之日督率工役如舊疏浚使運船悉由此達大江之京
倉實為民便帝命工部移文有司視其果利無害而後

為之 三月己巳先是帝諭工部臣曰國家重務在漕運今裏河自沙灣抵臨清皆淤塞不通爾工部其集文武議其疏治方畧以聞於是太子少師工部尚書江淵會同五府六部官議言運河之阻在疏浚之而已但今山東河南人力已罷且農事伊始難起夫役請將在京存操步隊官軍五萬人敕內臣及文武大臣各一人往同僉都御史徐有貞計度疏浚期明年二月興工四月可畢其器具乞量給銀兩令自置之仍先救河南山東

有司預積物料蓄軍糧以待帝遂敕有貞集河南山東
殷實餘夫民壯各一萬人先治之有貞言宜以漸疏浚
工力相繼若官軍一動糧儲銀兩輒有千萬之費遇水
漲則復坐費無所施智今泄口已合決隄已堅挑河者
已如命用工臣請仍舊例置撈淺夫唯用沿河州縣之
民免其徭役牧養之事使專事於此付管河官督領役
小則量數起之役大則舉戶皆行其非近河之人皆休
放使力農如此將遠者得安生業近者甘事河道不久

利無弊者吾未之信也帝以為然工部之議遂寢 五
月辛亥左僉都御史徐有貞奏運河疏濬功成帝謂工
部曰河雖暫通恐不能久其移文有貞尚宜督沿河夫
役以時挑浚勿致阻滯舟船 七月乙亥築沙灣決口
成沙灣之決垂十年至是會黃河南流入淮左僉都御
史徐有貞始克奏功凡費木鐵竹石等物累數萬計工
五百五十五日帝以河道雖完尚恐未堅命有貞明年
春仍往視之 丙戌命修直隸容城縣白溝河杜村口

及固安縣楊家等口決隄 八月丁巳管河主事李蕃
奏初為徐呂二洪水淺鑿陽武脾沙岡引黃河之水然
後舟楫流通近又見起夫浚封丘縣新集等處分脾沙
岡水以濟沙灣緣脾沙岡水微細不能兼濟二處恐沙
灣得水而徐呂乾澀得一失一非計之善况新集地高
費用頗多乞敕左僉都御史徐有貞等量度處置從之
九月戊子右僉都御史陳泰奉敕督浚儀真瓜洲江
都高郵寶應及淮安一帶河道至是以工完上聞凡浚河

一百八十里築決口九處壩三座役人夫六萬餘 十二
月甲寅復命左僉都御史徐有貞巡視沙灣 戊午免
徵沿河濟寧等十三州縣修河民所負官馬并雜科役
以左僉都御史徐有貞奏力役方勤不宜并取故也

丁卯挑通濟河西岸沙灘及築東岸缺隄

明英宗實錄

陸瑜為山東右布政河決張秋朝命僉都御史徐有
貞塞之委公督其役時工匠集者數萬為設方畧編
荆為筐實以土石沈而築之水患遂息尋轉左

何喬

新撰刑部尚書康僖陸公神道碑

明景帝景泰七年九月戊辰朔以右僉都御史陳泰巡撫南直隸蘇松等處時在揚州疏濬河道巡撫鄒來學卒戶部以聞故命泰代之 辛巳左僉都御史徐有貞奏京畿及山東自七月大雨至八月諸河水溢雖高阜亦有文餘隄岸衝決民田廬淹沒商船漂溺者無算幸新造水門一帶隄堰無患其衝決不甚害者臣已率有司督工修理唯感應祠舊隄所決既大所係尤要必置

禦水埽如水門埽堰之制仍於濟寧抵臨清增置減水
閘始可經久其修築人夫乞免他徭仍人給口糧庶易
成績帝是之仍敕有貞等督軍衛有司措置物料務在
堅完勿遺後患 十二月癸卯陞徐有貞為左副都御
史有貞以修河竣事回京入見帝顧問良久獎勞甚至
因命吏部特陞之 明英宗實錄

是年僉都御史徐有貞治河功成先是有貞疏上既
報可乃鳩工而前所遺卒亦依期至乃為渠以疏之

中置閘以節宣之渠起金隄張秋之首西南行九里至濮陽灤又九里至博陵坡又六里至壽張沙河又八里至東西影塘又十有五里至白嶺灣又三里至李峯由李峯而上又二十里至蓮花池又三十里至大瀦潭乃踰范暨濮又上而西凡數百里經澶淵以接河沁有貞曰河沁之水過則害微則利乃節其過而導其微用平水勢既成渠名廣濟閘名通源渠有分合而閘有上下凡河流之旁出而不順者則堰之

堰有九長各萬丈九堰既設水遂不東衝沙灣而更北出濟漕渠阿西郵東曹南鄆北出沮洳而資灌溉者為田百數千萬頃凡堰捷以水門繚以虹隄堰之崇三十餘尺其厚什之長百之門之廣三十六丈厚倍之隄之厚如門崇如堰長倍之架濤截流柵木絡竹實之石而捷以鐵蓋合五行用平水性而導汶泗之原出諸山匯澶濮之流納諸澤又濬漕渠出沙灣北至臨清凡二百四十里南至濟寧凡三百一十里

復建閘於東昌之龍灣魏灣者八積水過丈則開而
洩之皆道古河以入於海用平水道初議者欲棄渠
勿治而由河沁及海以漕又欲出京軍疏河有貞因
奏蠲瀕河民馬牧庸役專力河防以省軍費紓民力
工部請如有貞言不中制以是得有功蓋三年而告

成進副都御史

明紀事本末

徐有貞字元玉初名瑄吳人宣德八年進士景泰三
年遷右諭德河決沙灣七載前後治者皆無功廷臣

共舉有貞乃擢左僉都御史治之至張秋相度水勢
條上三策一置水門一開支河一濬運河議既定督
漕都御史王竑以漕渠淤淺滯運艘請急塞決口帝
敕有貞如竑議有貞守便宜言臨清河淺舊矣非因
決口未塞也漕臣但知塞決口為急不知秋冬雖塞
來春必復決徒勞無益臣不敢邀近功詔從其言有
貞於是大集民夫躬親督率閱五百五十日而工成
方工之未成也帝以轉漕為急命廷臣議方畧工部

尚書江淵等請遣中官偕文武大臣督京軍五萬人
往助役期三月畢工有貞言京軍一出日費不貲遇
漲則束手坐視無所施力今泄口已合決隄已堅但
用沿河民夫自足集事廷議遂寢事竣召還佐院事
帝厚勞之復出巡視漕河濟寧十三州縣河夫多負
官馬及他襍辦所司趣之亟有貞為言免之七年秋
山東大水河隄多壞惟有貞所築如故有貞乃修舊
隄決口自臨清抵濟寧各置減水閘水患悉平還朝

帝召見樊勞有加進左副都御史

明史稿

武功在張秋治水久未就功問於王尚書來尚書曰
分水勢尋水源武功於是先開數渠引水散為各支
流去而時或泛濫其害終在再三求源發處不得乃
投以物使人離數十里候之物復浮出如是者數處
武功曰水流則不受物源不在是再投之一處不浮
曰此乃真水源也以百計塞之皆莫效下以土石若
無者聞一僧有道武功就住謁之問術僧不肯言強

之但曰聖人無欲武功歸思而不得數日忽悟曰此
下殆有龍窟龍所欲者珠也吾能使之去於是鑄長
鐵柱洞釜底貫而下焉水始受塞不踰時遂成平陸
蓋鐵汁能蝕珠龍愛珠故去也武功時時為人道之

楊循吉蘇談

明英宗天順元年十二月丁巳尚寶司少卿凌信奉江
南運糧者泛大江至瓜洲壩有風浪之險宜從鎮江府
裏河而裏河自新港至奔牛一百六十餘里河道淺狹

又有三壩大船不利車盤七里港口又有金山橫阻江水不得入以故糧船多冒險損壞宜通七里港口引江水灌入濬新港至奔牛一帶為便奏下工部覆奏宜令管理糧儲河道官僉都御史李秉及郎中沈彬提調附近有司通濬從之

明英宗實錄

是年令總兵官兼理河道

道

明會典

明英宗天順二年三月癸丑管河主事陳湊奏濟寧州濟安閘水勢陡峻損壞船隻可移入二十餘步其舊閘

岸改砌月樣以順水性令不得撞激上命所司勘實移之十二月己巳先是直隸大河衛百戶閔恭奏南京並直隸各衛歲運薊州等衛倉糧三十萬石駕船三百五十隻用旗軍六十三百人越大海七十餘里風濤險惡滯流旬月及有順風開船行至中途忽爾又值風變人船糧米多被沈溺實非漕運之便臣見新開沽河北望薊州正與水套沽河相對止有四十餘里河徑水深堪行舟楫但其間十里之地阻隔若挑通之由此備運

則海濤之患可免雖勞人力於一時實千百年之計也
事下工部請移文鎮守薊州總兵巡按直隸御史勘其
利否至是都督僉事宗勝監察御史李敏皆報恭言善
其河應挑闊五丈深一丈五尺於附近天津永平薊州
寶坻等衛府州縣發一萬人夫委官督領俟明年春和
農暇之日興工然各處軍民艱辛者多宜一月人與行
糧三斗仍官給器具庶無勞損而功易成從之

明英宗

實錄

崔恭天順二年遷右副都御史巡撫蘇松諸府與都督徐公浚儀真漕河又浚常鎮河避江險已大治吳淞江起崑山夏界口至上海白鶴江又自白鶴江至嘉定卞家渡迄莊家涇凡浚萬四千二百餘丈又浚曹家港蒲匯塘新涇諸水民賴其利

明史稿

林鶚天順初知鎮江府漕故經孟瀆險甚巡撫崔恭議鑿河自七里港引金山上流通丹陽避之鶚言道里遠多石且壞民廬墓請按京口開甘露壩故迹浚

之令通舟春夏啓閘秋冬度壩功力省便恭從其議

遂為永利

明史稿

明英宗天順三年四月辛巳工部奏國家大計莫先於糧運今聞自通州以南直抵揚州河道膠淺糧運難行宜馳文於管河道官令量起附近衛所府州縣軍民設法疏濬其水塘泉源亦宜疏通以濟運河從之

明英宗

實錄

天順三年戶部尚書楊鼎上言阿拉齊住牧河套數

入寇掠費用浩繁凡銀兩引鹽收馬徵運之法盡行
尚為未足又起預徵之例民困財竭所不忍言惟黃
河乃漢唐漕運河即今鹽船木筏往來不絕其間雖
有三門折津之險而古人倒倉之法為當三門之上
有小河徑通延綏如以所運糧草各貯水次遡流備
運庶幾軍餉可足民力亦蘇或摘漕糧數千石赴陝
就令教習山西陝西河南之人待舟楫通後乃許迴
運且可順帶解鹽數十萬以充淮課則國利有增矣

詔從之後阻不行然倪岳許論嘗欲通舟河漕渭轉
漕邊鎮要皆經史所載非鑿空之說也

陝西通志



行水金鑑卷一百九

欽定四庫全書

史部

行水金鑑卷一百十三至

詳校官監察御史王爾烈

刑部郎中臣許兆椿覆勘

總校官知縣臣繆琪

校對官庶吉士潘庭筠

謄錄監生臣薛振基

欽定四庫全書

行水金鑑卷一百十

江南按察使傅澤洪撰

運河水

明英宗天順五年二月丙戌漕運總兵官右都督徐恭奏運河諸閘多狹隘臨清一閘尤甚而近造糧船高大開殆不能容請敕山東軍衛有司積工措料修移舊閘五十丈濬深三尺六寸增廣三尺庶不阻漕運上曰臨

清南北要衝之地其間乃淺狹如此即令有司修築之
乙未陝西按察司僉事李觀言涇水出涇陽仲山谷
道高陵至櫟陽入渭袤二百里晉漢穿渠溉田萬頃宋
元俱設官主之今雖有瓠口鄭白二渠督其事者不職
隄堰摧決溝洫壅滯民弗蒙其利官稅因之拖欠乞敕
布按二司堂上官督同被利州縣人夫依時疏鑿上命有
司浚之 七月乙丑修河西務要兒渡口 明英宗實錄

明英宗天順六年三月丁巳命疏浚淮安以南運河 明

英宗實錄

明英宗天順八年正月己未命修高郵湖岸三十餘里
以年久風浪撞激其磚石椿木皆脫落故也

明英宗實

錄

明天順八年七月壬申

時憲宗已
登極矣

都察院都事金景輝

言會通河自安山北至臨清二百五十餘里僅有汶水
若春月少雨則水脈漸微而舟行淺滯其汴梁城北陳
橋舊有古河一道北由長垣經曹州至鉅野縣安興墓

巡檢司地界乃出會通河合汶水通臨清每秋水溢有舟往來其間唯陳橋迤西一舍許水道淺狹水小之際不能流通請興工開浚亦可分引沁水仍置二閘以司啓閉則徐州臨清二河均得利濟而衛河之水亦皆增長且長垣曹鄆諸處糧稅可免飛輓之勞而江淮民舟又可由徐之浮橋達於陳橋至臨清而無濟寧一路壅塞之苦其利多矣事下工部請按實以聞 十二月壬午工部主事郭昇請修臨清新開上閘從之 乙未直

隸邳州知州孟琳奏本州榆行諸社俱臨沂河以久雨
河岸為水所崩者二十有八處諸社卑田湮沒殆盡乞
量興工役修築工部覆奏從之

明憲宗實錄

明憲宗成化元年三月戊申朔浚通濟河要兒渡口命
工部主事蔣瑄都督同知陳達董其役 五月庚午總
督漕運副都御史陳恭請修築高郵湖岸自杭家嘴北
起至張家溝鎮南止凡三十里有奇從之

明憲宗實錄

明憲宗成化二年四月辛酉浚薊州等處新開沽河

十二月甲子命御史一員提督通州迤南抵臨清及衛輝一帶河道先是命巡鹽御史魚巡河道至是總督漕運右副都御史滕昭言河道淺澀非專任不能疏通工部請如所言從之 九月丙子戶部會官議南京管糧都御史及漕運總兵等官所言事宜一兗州府城東舊有金口壩蓄水接濟運河每遇山水泛漲輒衝決費工修築宜將濟兗二府原設泉夫秋冬空閒之時采石塊包砌前壩一通州直抵儀真瓜洲一帶河岸壩堰閘座

近年多有坍塌損壞蓋沿河軍衛有司官不遵舊例以時修築遂致河道淤淺阻滯船行乞各委堂上佐貳官專一修理以便漕運議上俱從之

明憲宗實錄

明憲宗成化三年七月戊辰總督漕運右副都御史滕昭言儀真瓜洲孟瀆諸處河港乃貢賦必由之道舊因淺滯命旁近揚州鎮江常州諸府衛興工疏浚是後著令三年一浚然有司怠玩浚不以時直至窮冬召衆興役則手足皸痲雖浚無實徒為勞耳請自後每於冬初

即為興工從之 九月壬申戶部會六部等衙門官議漕運總兵及各處巡撫等官所言事宜條奏一徐呂二洪全藉河南脾沙岡等處水灌注接濟運船先年設主事一員後又添設河南參議一員專理近乃罷去兼管於河南布政司分巡官以致二源淤塞水利不興請如舊增置參議為便一濟寧州小長溝至開河驛隄上接汶泗等河下通黑馬等溝導引泉水以濟糧運元時州之西蓄孫村南望二湖之水設減水閘十餘座水大量

為減泄小則流入官河甚利今久失修葺日就坍塌且
每歲山水先壞隄岸春時無水接洽夏則漫流滄沒田
禾舟楫難行請如前修築一儀真至通州俱係運道而
淮揚一帶水路各有專官管理唯自直河至通州俱係
運道事多廢墜請令張家灣收輒主事督同所在軍衛
有司委官提調各淺夫老以時採取椿草每春糧運之
時遇有水淺漫流如法築置壩堰逼水歸洪庶糧運無
滯流之患上皆准議行之

明憲宗實錄

明憲宗成化四年六月癸卯工部管洪主事郭昇奏徐州洪勢最險自昔兩隄庠隘稍遇水漲舟行無路往來甚艱而閘河上口一壩勢亦如之雖頻年修築亦唯取辦一時殊非經久之策又如外洪翻船等石裏洪壩下一灣尤為險惡屢壞行舟今欲以大石修砌兩隄其外則錮以鐵錠其內則填以雜石而又鑿去外洪翻船惡石用石鋪平裏洪隄岸以便來往須勸率往來中外官員及遠近客商以給其費量倩所屬各淺夫及本洪溜

夫以供其役工部以聞詔可

明憲宗實錄 洪形象川
字有三道曰中洪外洪裏

洪在
徐州

明憲宗成化五年三月丁未工部奏自通州抵天津衛
河道淤塞漕運不通宜加疏浚其自天津迤南直抵揚
州一帶河道亦有淤淺宜敕總督等官通行疏通以便
漕運從之 明憲宗實錄

明憲宗成化六年七月庚子監察御史康驥奏請疏濬
張家灣橫河口小灣套以泊運船修整自京城抵通州

往來要路以便糧運上命俟年豐為之 壬寅工部奏
通州至武清縣蔡家口河口并隄岸被水衝開一十九
處宜起倩兵民并工修築以便漕運上從之命侍郎李
顯董其役 癸卯巡按直隸御史張誥奏請修築靜海
以南臨清以北一帶河口之被水衝塌者以便漕運從
之 九月己丑鎮守密雲署都指揮僉事王榮奏山水
泛溢衝塌古北口潮河白河龍王峪沿邊一帶關城墩
寨隄壩及密雲中衛南北城垣請撥軍修繕從之 十

月已酉戶部會官議巡撫漕運等官所陳事宜一運糧船隻凡遇淤淺之處宜行漕運衙門令各該把總都指揮指揮等官督各管糧船旗軍及當地淺夫併力挑撈淤沙疏通河洪使前船既過後船接續而行違者究問

明憲宗實錄

明憲宗成化七年正月甲申總督漕運兼巡撫淮揚等處右副都御史陳瀛奏運河一帶濟寧居中而南北分流久不疏浚蓄水不多况兩京往來內外官多不恤國

計不俟各閘積水滿板輒欲開放以便已私而南京進
貢內臣尤甚以此走洩水利阻滯糧運今欲會同山東
巡撫守臣計工挑浚且請旨禁約事下工部覆奏從之
十月乙亥改南京刑部左侍郎王恕為刑部左侍郎
奉敕總理河道陞工部員外郎郭昇為郎中山東按察
司僉事陳善為副使與工部郎中陸鏞分理之時太監
韋煥等奏運河淤淺請量增昇等職專理河道事下戶
部會同吏部尚書姚夔等擬議覆奏以為太宗皇帝肇

建北京以元人海運非便命平江伯陳瑄經畧糧運河道是以六七十年間漕運通利京儲山峙其良法美意度越前代近年以來河道舊規日以廢弛灘沙壅塞不加挑洗泉源漫伏不加揅滌湖泊占為田園舖舍廢為荒落人夫虛設樹井皆枯運船遇淺動經旬日轉催盤剝財殫力耗及至通州雨水淫潦僦車費多出息稱貸勞苦萬狀皆以河道阻礙所致因循既久日壞一日殊非經國利便煥所言誠為急務然自通州至儀真瓜洲

二三十里往來修治非一二人能辦况首尾不接歲月不常時無統制功難責成今宜進昇郎中專理沛縣至儀真瓜洲一帶善副使專理山東地方見管通州河道郎中陸鏞專理通州至德州一帶仍簡命風力大臣一員賜敕總理其事凡河道事宜根究本末以次修復其舊務為久便禁侵占阻滯者仍須審度人情事勢隨其緩急輕重以為先後他有便宜方畧可奉行者聽斟酌之限以三年底於成效不得虛應故事致誤國計上從

其議賜恕敕曰朕惟京師糧儲仰給東南漕運自平江伯陳瑄經理河道之後管河者多不得人舊規日以廢弛糧船阻淺轉輸延遲若非委任責成豈不有誤國計今分官管理一帶河道特命爾總理其事爾宜往來巡視嚴督各官并一帶軍衛有司人等用心整理閘壩損壞者修之河道淤塞者浚之河泊務謹隄防泉源毋令淺澀沿河淺鋪樹井及一應河道事宜但係平江伯舊規者一一修復不許諸人侵占阻滯凡有便宜方畧可

舉行者悉聽爾斟酌施行一應官員人等敢有違悞者
或量情懲治或具奏拏問爾仍須審度人情事勢隨其
緩急輕重以為後先毋急以擾人毋怠以廢事限以三
年務底成績如或因循不理致誤國計責有攸歸爾其
勉之慎之 丙戌戶部尚書楊鼎工部侍郎喬毅上浚
通惠河舊道事宜先是漕運總兵官都督楊茂奏每歲
漕運自張家灣舍舟陸運遇雨泥濘每車催銀一兩僅
載八九石其費皆出於軍看得通州至京城四十餘里

古有通惠河故道石閘猶存永樂間曾於此河船運大木以此度之船亦可行先年曾奏欲於此河積水般運又有議欲於三里河從張家灣煙墩橋以西疏挑二十里灣泊糧船以避水患者二事俱未施行今此河道通流其水約深二尺不勞疏挑唯用閘蓄水令運糧衛所每船二十五隻造一剝船自備米袋挨次剝運如此則運士得省腳費而困憊少蘇矣事下工部尚書王復同太傅會昌侯孫繼宗吏部尚書姚夔等官議得古通惠

河道開座設若開通修砌可以泊船可以運糧誠有益於國計但地形水勢高下并合用軍夫物料俱難約度宜請旨簡命戶工二部堂上官各一員會漕運參將袁佑率識達水利官匠前往相度如果相應就將該用軍夫物料修理事宜具奏會議定奪上以命鼎發遂同參將袁佑等親詣昌平縣元人引水去處及宛平大興通州地方三里河各河道將行船故迹逐一踏勘及據元史并各關見樹碑文所載事迹稽考回奏云開河原有

舊開二十四座以通水道但元時水在宮牆外船得進入城內海子灣泊今水從皇城中金水河流出難循故道行船須用從宜改圖除元人舊引昌平東南山白浮泉水往西逆流經過祖宗山陵恐於地理不宜及一畝泉水經過白羊口山溝兩水衝截俱難導引外及勘得城南三里河至張家灣運河口袤延六十餘里舊無河源正統間因修城濠作壩蓄水魚恐雨多水溢故於正陽橋東南低窪處開通濠口以泄其水始有三里河名

自濠口三里至八里始接渾河舊渠兩岸多人家廬舍墳墓流向十里迤南全接舊河入張家灣白河其水深處止有二三尺淺處一尺餘闊處僅丈餘窄處未及一丈今若用此河行船凡河身窄狹淤淺處必用浚深開闊凡遇人家房垣墳所必須拆毀那移且以今寬處一丈許之水深二尺若散於五尺之寬止深四寸况春夏天旱泉脈易乾流水更少糧船剥船俱難行使兼且沿河隄岸高者必須剷削低者缺者必須增築填塞又有

走沙急湍處俱要創開派夫修挑倘水淺少又須增引
別處水來相濟若引西河之水則自河口迤西直至西
湖隄岸未免添置閘座若引草橋之水必須於大祀壇
邊一路創鑿溝渠亦恐有礙況其源又止出彰義門外
玉匠局等處馬跑等地泉亦不深遠大抵此河天旱則
淤壅淺澀雨潦則散漫衝突徒勞人力率難成功決不
可開况元人開此河曾用金口之水其勢洶湧衝沒民
舍船不能行卒為廢河此乃不可行之明驗也今會勘

得玉泉龍泉及月兒柳沙等泉諸水其源皆出於西北
一帶山麓堪以導引匯於西湖見今大半流出清河若
從西湖源頭將分水青龍閘閉住引至玉泉諸水從高
梁河量其分數一半仍從皇城金水河流出其餘從都
城外濠流轉通會流於正陽門東城濠再將泄入三里
河水閘住併流入大通橋閘河隨時開閉天旱水小則
閉閘潴水短運剝船雨澇水大則開閘泄水放行大舟
況河道閘座見存不用增造官吏閘夫見有不須添設

臣等勘時曾將慶豐平津通流等閘下板七葉剝船已
驗可行若板下至官定水則其大船亦可通行止是閘
座河渠間有決壞淤淺處要逐加修浚較之欲創三里
河工程甚省况前元開創此河漕運七八十年公私便
宜後來廢弛今若復興則舟楫得以環城灣泊糧儲得
以近倉上納在內食糧官軍得以就近關給通州該上
糧儲又得運來都城與夫天下百官之朝覲四方外夷
之貢獻其行李方物皆得直抵都城下卸此事舉行定

實天意暢快人心歡悅足以壯觀我聖朝京師萬萬年
太平之氣象也伏望聖明早賜裁處乞敕各該衙門會
計物料量撥官匠并在營見操官軍人等自西山玉泉
一帶并都城周圍濠塹大通橋直抵通州張家灣一路
河道分工逐一修浚如此則不惟損一時糧運之腳價
實足以垂萬世無窮之利益矣疏入命下所司 十一
月癸丑霸州知州蔣愷固安縣知縣賈貴各奏霸州城
北古有草橋界河一道上接渾河下至小直沽順流東

注於海永樂間渾河改往西南流道經固安新城雄縣沿至霸州新河一帶水勢不順漸已淤塞累衝決為居民患近者衝決孫家口東流入河又東抵三角淀小直沽入海乃其故道請因其自然就下之勢修築隄岸使順流注海免貽後患上命順天府官勘實從之

明憲宗

實錄

王恕遷刑部右侍郎父憂服除以原官總督河道浚高郵邵伯諸河修雷公上下勾城陳公四塘水閘旋

改南京戶部左侍郎

明史稿

明憲宗成化八年正月己未工部奏漕運總兵官楊茂先乞敕通州至大通橋舊河石閘以免官軍車運之費有旨命戶部尚書楊鼎等勘報鼎等報云自西山玉泉并京城濠塹抵張家灣一路河道俱宜修浚已准撥官軍九萬餘名修理矣會有災異停各項工役而修河一事宜取旨上命依原擬量撥官軍四萬令總兵官趙輔郭登統領先浚京城濠塹仍以太監王順工部尚書王

復兼董其役其通州一路俟工完以聞 二月戊辰朔
鎮守永平山海總兵官東寧伯焦壽言薊州新開沽河
淤塞一千二百丈糧運不通而欲照先年奏准三年一
浚事例於順天永平二府及東勝等衛起撥軍民興工
緣今災傷人民缺食且農事將興欲行巡按御史親詣
其城勘視酌量暫濟漕運候明年三月以後并工疏浚
庶於民力少蘇邊運亦濟從之 八月癸巳修築淮安
抵儀真瓜洲湖河隄岸衝決者一十五處

明憲宗實錄

是年河道侍郎王恕請治揚州至淮安湖塘造閘壩

引塘水接濟運河

南河全考

明憲宗成化九年正月辛亥巡按直隸御史婁謙言漕河自通州直抵臨清多淤淺請於通州一帶各設管河官一員及委軍衛官相兼管理疏通并令捕盜事下河道侍郎王恕議以為當工部遂請移文吏部於順天河間淮揚四府各添設管河通判一員通州等州各設判官一員各該衛所俱推選廉幹官相兼管理仍行總理

管河等官往來提督奏上上曰河道只仍舊委官管理不必添設 已未總督漕運平江伯陳銑奏儀真瓜洲運河原無水源全賴揚州雷公陳公二塘及高郵寶應邵伯等湖積水接濟清河迤北至徐呂二洪則藉河南黃河鳳池口金龍口沁河等處諸水濟寧南北開河則賴徂徠沂泗泰山曲阜等處諸泉源并昭陽南旺孫村等湖水近所司視為泛常不為疏浚修築是致水利不通糧運有阻揆厥所由蓋因通州至儀真相離二三十

里往來巡視非一二人力所能辦宜酌量遠近自通州至德州責令郎中陸鏞專理自德州至濟寧則責之副使陳善自沛縣至儀真則責之郎中郭昇仍敕大臣一員總督其事庶事體歸一而工力可成工部議以為宜從之 三月丙申總河侍郎王恕言淮安南抵儀真瓜洲湖河隄岸被水衝決者一十五處其餘坍塌者二百餘里及儀真三壩衝倒修理物料俱揚州出辦今連年災傷民力不給欲於池州安慶二府支取遺輒并南京

龍江瓦屑壩二竹木局所抽分支作樁木令南京兵部
馬快船運送事下工部請行南京工部查勘定奪從之

明憲宗實錄

李恭敏公鏊湯陰人成化壬辰進士為都水司主事

管河臨清改作板閘

郭朴撰工部尚書李公傳

改刑部郎中從侍

郎何喬新賑荒山西開麗澤渠以灌田進鴻臚少卿

明史稿

明憲宗成化十年八月辛亥戶部會官議覆漕運巡撫

等官所言事宜一睢寧縣所管運河北自徐州南至宿遷二百餘里水多淺澀宜添設管理河道官一員其通州儀真一帶管河官止令專理河道不許別有差委一江浦縣地方北城圩舊有古溝河一道北通滁河其浦子口城東亦有黑水泉古溝一道南入大江兩溝之間中有岡隴截斷若因其舊蹟去其岡隴開成河道旱則可引江湖以資灌溉潦則可殺水勢宜行令巡視屯田御史督同應天府及浦子口橫海等五衛軍民開通務

責成效疏入從之

明憲宗實錄

明憲宗成化十一年八月辛巳命浚舊通惠河敕平江伯陳銳右副都御史李裕戶部左侍郎翁世資工部左侍郎王詔督漕卒疏浚先是銳等奏通州至京舊有運河一道廢閘尚存但年久淤塞損壞欲照尚書楊鼎奏准事理就借漕卒用工疏浚閉閘積水以運糧儲至是特令銳等會議提督漕卒自下流為始疏浚壅塞修閘造船合用糧料匠作於各司取用務求成功仍委附近

公差御史察其不聽約束者以聞 九月己酉巡撫山東左僉都御史牟俸奏山東舊有小清河上接濟南鈞突等泉下通樂安沿海高家港等鹽場大清河上接東平坎河等泉下通濱州海豐利津富國等鹽場後因淤塞衝決舟楫不通民苦般剝兼雨水滄沒其患尤甚近勸農參政唐瀆為之修浚造閘水利始通繼今非得人提督恐久而或廢乞令瀆兼治水利後繼任者亦如之詔可 十月癸未增設工部管理河道官一員漕運總

兵官平江伯陳銳等奏比奉詔疏浚通州至京河道工將就緒請設官理之并提督青龍等橋廣源等閘及西山一帶泉源時工部郎中陸鏞丁憂服闋因以命之

十二月辛卯置儀真縣河港三閘先是工部郎中郭昇奏江南進貢糧運等船至儀真壩雖夏月潮盛亦須人力絞輓方能達河少有錯失船即損壞而裏河壩岸恐為潮水衝決多開缺口以殺其勢水退復修為費甚大儀真縣羅泗橋舊有通江河港上至裏河幾四里許潮

大之時內外水勢相等此港可置三閘潮來先啓臨江
閘使船隨潮而進俟潮既平乃啓中二閘放之如此不
惟往來舟船利便而裏河水勢亦即疏洩不待決口重
費也詔可之昇會督漕都御史李裕勘議修完而儀真
店戶惡其奪已利賄囑所司假以走洩水利閉之至是
昇復條陳開閘之利不開之患工部覆奏以昇言誠有
益經久之策宜允所請從之

明憲宗實錄

明憲宗成化十二年二月己丑工部言永平府暨通州

等衛各奏原派疏浚通惠河并直沽新開沽人夫地方多有遠近欲得彼此相易為便會保定等縣亦言各縣河岸衝決數多有妨耕種乞存留原派協濟通惠河人夫以便修築而本部委官徐九思等亦各言盧溝橋及直沽天津迤北南營要兒渡口一帶河道衝決淤塞有妨漕運比之通惠河尤急宜如所奏准其存留移易其直沽蘆溝一帶河岸道路亦宜酌量緩急暫撥通惠河人夫用工唯要兒等渡則照原定人夫不必更動為便

從之 五月壬戌漕運總兵官平江伯陳銳等奏通者
修造通惠河閘成欲將山東泉源河道并通州等處水
關閘座與永通橋圈俱量為疏浚修改以便漕運上從
其議下所司知之 六月丁亥浚通惠河成自都城東
大通橋至張家灣渾河口六十里興卒七千人費城磚
二十萬石灰一百五十萬斤閘板椿木四萬餘蒜鐵桐
油各數萬計浚泉三增閘四凡十月而畢漕舟稍通都
人聚觀增平江伯陳銳祿米歲二百石賞侍郎翁世資

王詔綵緞表裏銳又為浚河官乞恩乃命邳州衛指揮
僉事單鏞高郵州判官林烈等十員俱陞署職一級其
餘職役匠卒皆賜綵緞絹布有差是河之源在元時引
昌平縣之三泉俱不深廣今三泉俱有故難引獨引西
湖一泉又僅分其半而河制窄狹漕舟首尾相銜至者
僅數十艘而已無停泊之處又沙水易淤雨則漲淤旱
則淺涸不踰二載而淺澀如舊舟不復通然銳之所增
祿米猶歲給不絕識者愧之 丙申陞山東兗州府通

判陳翼為順天府通判專理通州以上河道并西山一帶泉源漕運總兵官平江伯陳銳等言翼長於治水嘗疏濟寧州永通河改修耐牢坡等閘具有成績故有是命 七月丙午總漕李裕等奏新開揚州白塔河潮水往來恐久而淤淺宜下所司與瓜洲儀真諸河皆三年一浚又言江南孟瀆河亦多淤淺乞下巡撫巡按等官勘驗疏浚以便漕運工部覆奏從之 甲寅增設直隸江都縣留潮通江二閘 九月丙辰漕運總兵官平江

伯陳銳奏通惠河雖已通行然其間猶有未畢工者欲再疏浚使加深闊擬摘江北運糧衛所軍約一萬名委都指揮等官督管於明年二月興工乞官給以廩給口糧食鹽從之

明憲宗實錄

行水金鑑卷一百十

欽定四庫全書

行水金鑑卷一百十一

江南按察使傅澤洪撰

運河水

明憲宗成化十三年七月戊子管理河道工部郎中楊恭奏六月以來久雨水溢運河東西兩岸衝決甚多有妨糧運乞撥京營官軍修築仍命文武大臣董之庶克濟事章下工部議宜移文都督同知陳達同楊恭於通

州直隸天津等衛附近處所量起軍餘三千名順天府沿河州縣起民夫一千名相兼隄淺人夫并工修築以便漕運并行戶部每名給與行糧仍令董工官盡心提督務在堅厚以圖經久從之

明憲宗實錄

李裕成化中進右副都御史總督漕運兼巡撫江北諸府浚白塔孟瀆二河以便漕張秋南旺及淮安西湖舊編木捍衝激勞費無已裕與郎中楊恭等謀易以石遂為永利

明史稿

明憲宗成化十四年二月丙午管河郎中楊恭奏兗州汶上縣直抵濟寧運河隄岸衝決一百一十里今欲葺理每夫一名乞月支口糧三斗從之 三月辛卯太監

汪直言高郵邵伯寶應白馬四湖每遇西北風作則糧運官民等船多被隄石樁木衝破漂沒宜築重隄於隄之東積水行舟以避風浪工部議合行漕運總兵巡撫等官相度增築從之

明憲宗實錄

明憲宗成化十五年九月壬申詔修南京內外河道先

是南京監察御史何舜賓奏南京城內外河道淤淺宜發丁夫疏浚下南京工部暨守備等官按視以為宜如所奏其工力於京民丁多而家富者量役之及浙江蘇松等府大戶運糧至京亦令量助仍令舜賓等管理聽其設法以補不給從之 十月壬子陞工部郎中楊恭為通政司右通政仍管河道恭管理北河直抵濟寧一帶河道六年考滿漕運總兵等官奏保陞職仍舊任事吏部議擬通政司叅議詔曰恭既管河勤能准陞右通

政恭在河道承奉太監汪直故有不次之擢也

明憲宗實錄

恭於二十三年以京察間住亦見實錄

明憲宗成化十六年九月

闕

戶部會官議漕運及巡

撫等官所陳事宜一大名府元城縣小灘官軍兌糧河道淤淺宜於元城館陶二縣增置主簿一員職專疏濬是年甃呂梁洪二石堤長七十餘丈築石壩一百六十五丈復於灞西築隄二十餘丈呂梁洪在徐州東南六十里有上下二洪相距七里亦運道要害

南河全考

二洪在萬曆三十四年以前最為險要
自李化龍開泇河而二洪不為運路矣

明憲宗成化十七年五月庚辰南京工部員外郎吳程
言近御史何舜賓建議乞疏濬南京河道以便糧運今
天時亢旱人心靡寧乞暫為停止以蘇民困事下工部
覆奏請如理言候豐年再陳區處上曰河實淤淺宜在
疏濬惟慎擇官董之不必止也

明憲宗實錄

成化十七年既塞河南決口又自揚州鑿河四十里
以泄積潦蠲災賑饑伐材為屋以居流民比還民遮

道留之

王鏊撰兵部尚書薛公神道碑
公名述以工部侍郎治河

明憲宗成化十八年二月己未工部以管河右通政楊
恭巡河監察御史趙英會勘漕運總兵官陳銳所奏欲
於臨清縣南三里開通月河分減水勢誠為利便但言
東平州戴村修砌減水石堰欲行山東科派夫料而歲
荒不能給宜於銳原借本部修路銀內支用或人力不
足於附近無災縣分取之庶事易集而民不勞從之
秋八月久雨衛漳滹沱等河漲溢運河口岸多決自清

平縣至天津衛凡八十六處大蒙等村屯凡九處

明憲

宗實錄

明憲宗成化十九年九月丁巳戶部會官議奏漕運巡撫等官所上事宜一武陟等縣沁河其源出太行山下流接徐州運河舊各縣無管河官巡視修理遇夏秋水泛堤岸多被衝決請於武陟新鄉復嘉原武陽武封丘祥符等縣各增設主簿一員專巡河道如議

明憲宗實

錄

明憲宗成化二十年十月丁巳停總理河道通政司右
通政楊恭俸三月以漕河淺澀運船多過期不至為戶
部所叅奏也 十二月戊午吏部尚書兼華蓋殿大學
士萬安等言我朝建都於北上下供用多取給江南然
必藉船運而後可達京師是運道水利所係甚重如河
南懷慶府地方築隄障沁水以濟徐呂二洪及邳州宿
遷桃源運道山東兗州等處導引汶泗洸河諸泉以濟
濟寧上下運道今沁水衝決隄岸流入黃河汶泗洸諸

泉歲久不浚亦多壅塞以致河身淺澀糧運稽遲及四方進貢方物等船不便往來雖工部亦嘗奏行兩地巡撫巡按管河官員督工修理但恐仍前泛視來歲運道不得水利接濟所誤非輕請敕工部重臣一員選領諳練屬員一員詣彼會撫按督有司一一踏勘衝決壅塞之處修築疏浚上是之命工部侍郎杜謙率其屬郎中蕭冕員外郎李濬往董其事因救謙曰朕唯國家公私物用取給江南而運道水利關係甚重近年以來河水

淤淺加以天旱沁水決入黃河汶泗洸諸泉又多壅塞以致水利不通有妨漕運特命爾謙自通州臨清直抵淮揚一帶會同山東河南巡撫巡按督責三司府衛官并管河管泉官員逐一踏勘凡係蓄水接濟運河堤岸何處衝決所當修築泉源何處壅塞所當疏浚及會計合用工作木料預為措辦待明年凍開相度事勢緩急工程小大起集軍民趁時修理務俾水利通行舟楫無阻斯為有益此誠國家大計凡事有相關及敕內該載

不盡者聽爾計議便宜而行文武官敢有怠慢誤事者
輕則量情責罰重則文職五品以下徑自執送問刑衙
門問理四品以上并方面軍職叅奏執問各巡撫巡按
有不用心者亦具實來聞

明憲宗實錄

明憲宗成化二十一年正月庚戌詔修河夫月給米人
三斗時遣工部左侍郎杜謙自通州抵淮揚督修謙以
所在民饑請量給官廩戶部議如其言從之 七月辛
未工部左侍郎杜謙奏奉敕修浚河南山東等處運道

沁衛二水已經相度緩急修浚頗有次第臣今竊究其弊緣無大臣總理雖有管河官員多為親臨上司改委顧彼失此不得專於職務乞如侍郎王恕總理河道事例增設工部侍郎一員其沁衛二河河水經涉地遠遇有旱澇人夫浚治無官管攝乞如山東泉源事例增設主事一員及臨清以北至德州俱無管河官乞依臨清以南事例增設管河判官主簿一員本部議覆上曰侍郎不必增設餘如所議

明憲宗實錄

杜謙字益之昌黎人景泰甲戌進士授工部主事即
涖徐呂二洪洪當運道中迅流立石齧如齒列盤渦
盪激舟稍失制則人與貨俱沒公至相其地勢詢其
水患稍加平治舟賴以濟歲適歉山東淮北流離飢
餓之民叢集兩岸隨舟上下號呼乞食公設法勸率
得米為淖糜以食之全活甚衆後佐工部時漕河淤
塞糧道不繼衆議舉公往任修浚之事公自通州循
河流以抵淮揚相地勢去淤塞導源泉修閘壩漕河

復通竣事復命上嘉之有交綺楮幣之賜

杜公墓誌

成化壬辰銳鎮淮揚挂漕運印已亥於淮河壩改石
閘修造移風清江福興四閘包砌塘岸疏通泉源辛
丑仍於濟寧分水龍王廟自南距北可十里各置一
閘以節蓄水利總漕事十四年河道之修築轉漕之
利弊政事之得失前後建百有餘章廿一年乙巳改

管南京中府事

陳鶴平江伯陳銳傳

明憲宗成化廿三年二月庚辰工部奏直沽迤東海口

新開沽河道例應三年一浚宜遣官并行巡撫都御史
李田等如例起夫六千給以口糧并工疏浚從之

明憲

宗寶錄

明成化間開濟寧西湖自耐牢坡至塌場口長九十

里汶水入焉改耐牢坡閘名永通

北河續記

成化間有議疏天津水運至宣大省兵餉主事楊讚
相度地有游沙不可濬水勢相懸有至二百丈又多

天險人力難施遂止

朱國楨湧幢小品

明孝宗弘治元年二月辛亥修儀真瓜洲二處壩下河口及淮安府福興閘 八月丁巳南京守備太監蔣琮奏揚州儀真地方羅泗橋舊有通江港可開閘放船成化間巡河工部郎中郭昇奏濬通河面置二閘潮滿則開潮退則閉船隻經過無復盤費損傷之患時有奸豪侵占牽路於沿河水次起蓋浮鋪為買賣者恐斯閘一開必致折改往往以河水易洩為辭欲墮其成昇因力辨浮議條陳五利冀以行之久遠而司漕運者悞聽奸

詞擅行築塞致令往來船隻仍前受害近壩居民謂為
得計就於臨河牽路起蓋文天祥祠宇欲使後來不敢
輕易改拆而守備指揮亦於閘上擅自蓋亭索取財物
乞依前修濬開放及將奸豪侵占牽路所蓋舖屋祠宇
但為折改則奸弊可革便利可興工部覆奏命巡撫官
會同總兵官從公勘議以聞

明孝宗實錄

明孝宗弘治二年四月丙午修滹沱河白馬口及近城

隄共三千九百餘丈

明孝宗實錄

弘治二年河失故道泛及汴堤巡撫大臣具疏奏聞
事下工部集議舉可以治水者令刑部左侍郎白公
昂居南京兵部僉以其名對詔可乃改公戶部遣人
特敕賜之以行公受命乃言河患甚急非臣一人所
能獨治唯郎中婁性為臣屬官其才可任詔亦可於
是婁君往受公謀畫以河舊自歸德府之飲馬池東
入睢水經宿州靈壁至宿遷小河口入泗唯睢淺隘
不能受故其勢瀾漫橫溢并及永城夏邑蕭縣碭山

睢寧等處其治之無緩婁君以為然乃協謀於巡按
憲臣命鳳陽知府章銳相其便宜以興工役而推官
李涓宿州知州萬本分行治之自宿遷而上至歸德
而止並加疏浚使淺者以深隘者以闊其旁民居田
畝悉築堤以護其崇一丈又於符離橋南鑿月河一
道長五百丈闊十丈深二丈五尺沿河置減水閘七
及浚渠一皆為防河計也凡役工夫三萬人經始於
三年之夏五月至秋八月而畢

吳瑞字德徵成化乙未進士弘治己酉歷工部郎中
治濟寧以南河道值久旱舟膠不前公知之兼程抵
任相宜從事鑿新河浚舊河增壩閘時蓄洩水道而
舟前軍民稱便高郵甃社湖風濤覆舟舟人多溺死
公度傍湖田鑿複河延袤四十里遇風舟由複河可
免覆溺功成而田賦額存民患之同事者議撥荒田
補賦公以為非便上疏乞蠲除下戶部議卒如公疏
至今利賴辛亥以疾乞歸

黃雲樞吳郎中墓志

明孝宗弘治三年二月辛卯疏浚直沽迤東海口并新
開沽一帶河道 十一月癸未侍郎白昂奏處置河道
事宜乞令揚州府管河通判常居瓜洲總管閘壩不許
回府營幹他事南北直隸山東府州縣管河官令其沿
河居住管理河道不許別有差委其兗州府通判則令
常居南旺分水地方專管撈淺并提調各閘若山東布
政司勸農叅政則令兼管河道修理疏濬事下兵部覆

奏從之

明孝宗實錄

白公昂見高郵之甃社湖風浪時作多覆舟或舟觸岸輒壞議即其東開複河以避其患河成舟安行無險名其河曰康濟人思公惠別名白公堤

吳寬白公

傳

白公昂視運道自山東抵揚州議所以濬治時監察御史孫君衍工部郎中吳君瑞董河事與巡撫右副都御史李公鼎漕帥署都督僉事都公勝署都指揮同知郭君鉉合議高郵州運道九十里入新聞河湖

東直南北為隄舟行其下自國初以來障以樁木固以磚石決而復修者不知其幾其西北則與七里張良巖社石臼平阿諸湖通縈迴數百里每西風大作波濤洶湧舟與沿隄故樁石遇輒壞多沈溺前此董河事者嘗議修湖東鑿複河以避風濤便往來不果行今欲舉運河便利宜莫先於此者白公議運遂相地興工開鑿起州北三里之杭家嘴至張家溝而止長竟湖廣十丈深一丈有奇而兩岸皆壅土為隄樁

木磚石之固如河岸首尾有閘與湖通岸之東又為
閘四涵洞一每湖水盛時使從減殺焉以三年三月
始事凡四閱月而成自是舟經高郵者人獲康濟白
因采衆議聞之上名曰康濟河

劉健高郵州新開康

濟河記畧

四年漕運總兵官都勝請濬揚州揚子橋灣頭河道
發丁夫萬餘渠中掘得都巡檢漢壽亭侯都統制觀

察使印四顆

南河全考

明孝宗弘治五年六月己未南京戶科給事中羅鑒等
應詔言五事一理漕河金溝淺之阻宜於大河西岸開
河避之南旺湖之阻宜於孫村西岸開河避之 八月
丙寅惜薪司左司副何鼎奏通州倉貯糧一時權宜初
非經久軍士不便於關支警急不便於防守請於都城
隙地增置倉廩移通州倉糧於其中且請修濬大通橋
以東石閘河道令漕舟直至橋下以省轉輓之勞戶部
會議以為京倉之建固善但時詘未可舉羸河閘之說

果便然後施行從之 九月己巳朔直隸鳳陽府知府
章銳應詔言六事一謹河防沛縣迤北臨清迤南閘座
多被附近無籍小人作弊有於始建之時通同匠作將
閘底高起致水搏激又有陽雖閉蓄陰實泄放乞敕各
處管河郎中御史等官治下所司知之

明孝宗實錄

李景繁字邦泰儀封人成化五年進士歷都水郎中
管漕河時漕塞自儀真入淮凡三百里舟膠不行有
詔命都御史暨郎中治景繁獨任之募夫八萬人初

濬邵伯湖揚子橋三汊河廣皆六丈次濬廣陵驛東
廣倍於三汊次濬樸樹灣廣三倍於初次濬儀真瓜
洲二壩廣倍於樸樹者三深於舊者各五景繁行瓜
洲隄上見東南多沮洳區問土人此何所也曰江潮
之滙也景繁導之自古劄港劉家灣入漕渠曰今漕
渠非得巨流濟之舟終不可行如值江潮時開壩開
恣江北走已即塞之天復大雨漕事成矣土人曰河
亢而江下非壩障之則河水悉倒流入江漕渠益淺

都御史而下咸謂李策非善景繁曰江水故平潮至則悍激耳潮退水亦易制也遂下令有司具土暨石潮至大決壩開江水奔漕水聲洶洶如雷景繁乃塞壩閱數日會大雨漕渠水瀰瀰襄岸舟乃大行河經徐州盪州將嚙居人震恐景繁又作石堤河不能為害弘治六年遷山西右叅議理儲轉四川右叅政致仕

仕

來睦棹山西叅政李公傳

明孝宗弘治六年十月戊辰巡撫河南都御史徐恪奏

言河南府有伊洛二渠彰德府有高平萬金二渠懷慶府有廣濟渠及方口堰許州有棗祇河渠南陽府有召公等渠汝寧府有桃陂等堰其他故渠廢堰在在有之濬治之功灌溉之利故老相傳舊志所載不可誣也雖行分守等官疏導然事非專委難以責成請敕布政司撫民參政朱瑄專領其事從之賜瑄敕曰邇者官奏河南郡縣踰時不雨輒赤地相望流移載道水利一事所當預圖其河南等府伊洛等渠歲久湮蕪多被王府屯

營侵塞及勢要之家占作碾磨雖已行令分守分巡官
提督修舉然不責攸歸未免顧此失彼且更代不一難
以責成以爾素有才謀不避艱險可委專理爾其親詣
前項渠堰再行酌量時宜以次興舉合用木石等料於
各該田多有力之家從公勸諭或別為措置量起所在
附近軍民人夫相兼整理選委的當官員人等提調務
臻實效無事虛文原置閘處仍舊置立以時啟閉仍將
得利之家地上頃畝逐一勘明籍記在官遇旱則官為

斟酌驗畝分水以杜紛爭以後堙塞就令得利軍民併
工開濬有潰決之處亦就培築隄防務圖經久其豪強
軍民敢有仍前截水安置碾磨占作稻田者依律究問
故救 甲申增設工部主事一員管理沽頭上中下三
閘先是大理寺左少卿屠勳言沽頭水勢最為易涸從
來嘗設主事管理人以為便近因革去往來有勢力者
不時啟閉民船動淹旬月乞救工部移文管河郎中常
川在彼管理工部覆奏以為管河郎中自濟寧以至儀

真所經地方千有餘里若坐守一方不免顧此失彼宜

仍設主事一員專理從之

明孝宗實錄

弘治癸丑河決張秋甲寅六月公奉敕往治之加太

子太保乙卯回京加太保兼太子太傅

陳鑑平江伯

陳銳傳

明孝宗弘治七年三月壬子工部言頃河決張秋命右
副都御史劉大夏往治之今聞河防修築未完自臨清
至沛縣運河俱淤淺而管河郎中陳綺方在彼督役恐

不能周歷諸地本部欲遣屬官有幹局者往會大夏計處以相其成遇淤淺之所則多方疏濬事畢而還從之

五月即命內官太監李興平江伯陳銳同來治河語在河水

七月乙丑高郵康濟河

成初南京兵部左侍郎白昂奏凡高郵湖行船最忌西北風往來舟楫多致覆溺若於磚塘內開複河一道引水行舟可免風濤之患於是巡河監察御史孫衍管河郎中吳瑞因共挑濬并置閘堰築隄岸以利牽挽往來稱便焉

康濟河於三年告成見前劉健記而實錄紀於七年蓋至是始得開於上也

十月戊

寅副使楊茂元奏山東連年荒旱今歲積雨為災兼修
塞張秋決河供給不貲差科繁數請取回鎮守臨清右
監丞李全別用兵部覆奏謂臨清鎮守官嘗取回別用
一旦復設中外駭訝宜從茂元所請凡在臨清內外供
給亦請悉從節省上曰臨清地方亦須用人鎮守李全
不必取回餘如議行之

十二月壬申陞山東布政司左參政張縉為通政司右
通政提調沙河至德州河道太監李興等言縉修河有

功今決河已塞仍須令管理河道因以命之

明孝宗實

錄

張縉為山東參政弘治癸丑河決張秋上命平江伯
陳銳都御史劉大夏治之百需悉委調度甲寅功成
遂陞其秩為通政司右通政屬之行河時衝決之餘
溝防不治縉相其緩急以漸修浚無所遺又於決口
之東甃石岸數里以圖勿壞又新築南旺東堤樹柳
其上每歲夏秋水溢輓卒得分行無阻至今使之

雷

禮戶部尚書張縉傳

明孝宗弘治八年十月丙寅內官監太監李興平江伯
陳銳都御史劉大夏奏河防糧運六事一謂漕河水利
全藉山東諸泉每年夏秋瀦蓄南旺等湖至旱乾時以
濟糧舟近豪強軍民或決堤泄水以圖裁濬或阻遏泉
源以資灌溉乞照先年侍郎白昂奏行事例禁治一謂
南北運河止是汶水分流接濟春夏旱乾水源微細必
藉各閘積水以時啟閉庶可行船往往官員隨到隨開

以致糧運阻滯乞申明列聖詔旨嚴加榜示一謂管河官員責任太輕事多掣肘乞敕河南管河副史張飛大多府帶管隄防參政李瓚俱照管河管屯官事例常川巡視聽其便宜行事巡撫等衙門不得有所阻撓一謂安平鎮黃陵岡荆隆口及新築于家店以下隄防俱用人守視水涸則積土備用水漲則防護修築若有重大工程臨時調附近丁夫協同修理一謂大名府所築長隄必須逐年增修庶保經久乞行參政李瓚以所屬隄

北人戶編定班次每年農隙之時調發若干增修一月
疎放隄北軍屯與寄居人戶亦一體從輕編定輪流調
發庶免起夫科擾之弊一謂濟寧迤北南旺開河戴家
廟一帶比之他處最要而安平鎮地方土脈疎薄新築
決口尤須提調官員不時檢點今自濟寧直抵通州相
去一千八百餘里而天津北上逆水尤難若止責與一
人提調恐致誤事乞敕該部依臣等前奏仍分其地為
三南北各設工部郎中一員中間增設通政一員提調

下工部覆奏俱從之

明孝宗實錄

喬縉字廷儀洛陽人成化八年進士為都水司主事督理山東泉源初漕由魚臺至臨清行泲汶沂泗四水其地復有泉百七十餘道會於四水而分流於漕渠為閘凡三十有六設守津吏以時啟閉為淺二百二十各有津老以時疏治然歲遠法弛諸泉湮塞或為豪宦侵匿漕運屢屢告艱縉行郡得堙塞泉四百有奇侵匿泉二百有奇合六百餘泉會於四水漕運

大濟工部以績奏改兵部職方歷四川參議

朱睦㮮

作喬公侍

行水金鑑卷一百十一